

La pcd è trumpada

■ **La Partida cristiandemocratica (pcd) dal Grischun prenda be cun satisfacziun parziala enconuschientscha dals resultats da las votaziuns federalas dals 28 da favrer 2016. Trumpada è ella spezialmain ch'il Grischun ha refusà l'iniziativa per dismetter il chasti d'esser maridà, sch'era be cun in pitschen surpli da 931 vuschs negativas (50,8%).** Deplorablain è l'iniziativa da la pcd – per abolir il chasti d'esser maridà – na vegnida acceptada sin plaun naziunal. Quai deplorescha la pcd grischuna ed è era fitg trumpada che pèrs maridads ston pajar malgistamain vinavant memia autas taglias. Positiv è dentant – ord vista da la pcd grischuna – che la maioritad dals chantuns è stada per dismetter quest chasti. Dentant ha la votaziun fatg naufragi pervi da la maioritad dal pievel. Il resultat è dentant dapli che be in success remartgabel. El mussa che la pcd politisescha burgaisamain, manivel al pievel e per ina ferma e vasta classa mesauna. Represchentants e represchentantas da la pcd grischuna èn s'engaschads fermamain ils davos dis per levgiar la famiglia. La pcd è persvasa che quest engaschi sa paja e vegn perquai a cumbatter vinavant per stargiar la classa mesauna e las familias.

Il gea a la sanaziun dal tunnel stradal dal Gottard legra la pcd dal Grischun. Il

quità da noss chantun, da vegnir engrevgià durant ina eventuala fasa da sanaziun da l'existent tunnel stradal cun dapli trafic, è vegnì chapì da Svizras e Svizzers. Il gea al segund tunnel è d'engraziar grondamain a l'engaschi instancabel da la cuss. fed. cristiandemocratica *Doris Leuthard*. La decisiun dal pievel mussa dentant era ch'in augment da la capacitad al Gottard n'è betg giavischà – e da quai è da prender enconuschientscha.

Plaschair ha la pcd dal Grischun dal na a l'iniziativa dal repatriament effectiv. Svizras e Svizzers han qua tras demussà che legalitad e procedura correcta valian vinavant per noss pajais. Uschia po l'iniziativa davart la repatriaziun vegnir messa en vigur sco decidida dal parlament federal.

Tenor quella po vegnir examinà proporzionalmain schebain persunas estras criminalas èn dad expulsar. Per la pcd grischuna vala che tgi che vul il dretg d'ospitalitad tar nus ha era da sa tegnair vi da nossas reglas.

La pcd grischuna gratulescha a *Sepp Föhn* tar sia reelecziun onurifica sco president communal da Landquart. El ha fatg 2088 vuschs tar il pli absolut da 1126 vuschs. Uschia vegn la terza gronda vischnanca dal Grischun presidiada vinavant d'in commember da la pcd.

Pcd grischuna